



Republika e Kosovës
Republika Kosovo / Republic of Kosovo
Kuvendi i Komunës Rahovec
Opština Skupština Rahovac/Municipality of Rahovec



PROCESVERBAL

Nga mbledhja e rregullt e kuvendit komunal të Rahovecit, e mbajtur më **25.11.2022 (E premte)** me fillim në ora **10:00**. Mbledhjen e kryesoi: Kryesuesi i kuvendit z.**Defrim Kafexhiu**. Konstatohet se kuorum për mbajtjen e mbledhjes kemi.

Kryesuesi – Fillimisht më lejoni t’ju përshëndes. I nderuar kryetar i komunsës z.**Smajl Latifi**, i nderuar nënkryetar i komunës z. **Fatmir Iska**, të nderuar kuvendarë, drejtorë të drejtorive komunale, përfaqësues të KFORI-it, media, të nderuar qytetarë të komunës së Rahovecit, kjo është seanca e njëmbëdhjetë për këtë vit kalendarik.

Atëherë KPF në mbledhjen e mbajtur më 15 nëntor 2022 pas shqyrtimit të pikave të rendit të ditës që janë propozuar nga kryesuesi i kuvendit në koordinim me kryetarin e komunës, ka propozuar këtë rendi dite me 8 pika:

REND DITE

1. Shqyrtimi dhe miratimi i procesverbalit nga mbledhja e kaluar;
2. Pyetjet dhe përgjigjet në pyetjet e kuvendarëve;
3. Shqyrtimi dhe miratimi i propozim-vendimit për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës: P-02279-0, P-02280-0 dhe P-02281-0;
4. Shqyrtimi dhe miratimi i propozim-vendimit për ndryshimin dhe plotësimin e vendimit 01 Nr. 1427 i datës 30.04.2019 për themelimin e çmimit për krijimtari letrare e artistike “Sulejman Krasniqi”;
5. Shqyrtimi dhe miratimi i propozim vendimit për lirim nga pagesa e Mamografisë për të gjitha gratë e komunës së Rahovecit;
6. Shqyrtimi dhe miratimi i propozim-vendimit për dhënien në shfrytëzim afatgjatë të pronës së paluajtshme të komunës nr. P-71510057 -08924-0 personave fizik dhe juridik;
7. Shqyrtimi i Raportit të Auditorit të Brendshëm për vitin 2021 dhe diskutimi i planit të veprimit;
8. Shqyrtimi i raportit vjetor të Planit të Integritetit në Komunën e Rahovecit;

Pika shtesë;

9. Shqyrtimi dhe aprovimi i vendimit për shfuqizimin e vendimit për shpalljen me interes të përgjithshëm publik P- 71510033-01041-1 në zonën kadastrale në Xërxë;

10. Diskutimi rreth fushatës nacionale “16 ditë aktivizëm kundër dhënës në baza gjinore”.

Kryesuesi – Ky është rendi i ditës i përgatitur për sot, nëse dikush prej anëtarëve të kuvendit ka ndonjë propozim?... Nëse jo, atëherë i kemi edhe 2 propozime tjera si pika shtesë në këtë rend dite. E para është; Shfuqizimi i vendimit nr. 01 nr 375-22 i datës 23.09.2022 për shpalljen me interes të përgjithshëm publik P-01041-1 në zonën kadastrale në Xërxë. Pika tjetër shtesë ka të bëjë me fushatën globale 16 ditë aktivizëm kundër dhunës në bazë gjinore, e kemi parë të arsyeshme që ta propozojmë si pikë shtesë të rendit të ditës

RAHOVEC / ORAHOVAC

Njësia Nr./Br./No 01 (Kuvendi i Komunës)

Nr./Br./No 01/22 Nr. i faq./Br.str./No.pg 4/5

Data/Datum/Date 28/12/2022

për të diskutuar rreth mekanizmave kundër kësaj dukurie. Atëherë këto dy pika po i vendosi në votim. Kush është për?... Me shumicë votash edhe këto dy pika shtohen në rend dite për seancën e sotshme. Po e vendosim miratimin e rendit të ditës me gjithsej 10 pika. Kush është për?... Me shumicë votash miratohet edhe rendi i ditës për sot.

1. Shqyrtimi dhe miratimi i procesverbalit nga mbledhja e kaluar;

Kryesuesi – A ka dikush prej anëtarëve të kuvendit ndonjë vërejtje rreth procesverbalit të mbledhjes së kaluar?... Nëse jo, atëherë po e vendosim në votim. Kush është për?... Me shumicë votash miratohet edhe provesverbali i mbledhjes së kaluar të seancë së rregullt.

2. Pyetjet dhe përgjigjet në pyetjet e kuvendarëve;

Ilir Pallqa – I nderuar kryesues, kryetar, kolegë asambleistë, drejtorë të drejtorive, të pranishëm tjerë në sallë. Shumë shpejtë pritet të fillojnë punimet për sheshin qendror. Gjatë punimeve, stadiumi do të priset. Ju kryetar, e keni vendosur një lokacion për ndërtimin e stadiumit të ri. Sipas jush, ky stadium do të ndërtohet te Epopeja e Rahovecit. Ky lokacion, pos juve, nuk i pëlqen ambientalisht hiç askujt për stadium. Nuk kam takuar as edhe një banor të vetëm të Rahovecit që sado pak ka një mendim të mirë për këtë ide. D.m.th. një projekt kaq të madh ju po e bëni pa marrë parasysh mendimin e asnjë banori, asnjë sportdashësi, “veç qysh tu ka tek ty” – ska diskutim. Pra, ti po pretendon me bë një stadium për Rahovecin, në një vend ku çasje më të lehtë kanë banorët e komunës së Malishevës, po ia bëni edhe një stadium tjetër Malishevës, po harron kryetar i cilës komunë je. Ajo pjesë është në mal dhe gjendjet në lartësi mbidetari 671m, vështirë e përshtatshme edhe për të shikuar ndeshjen, e lëre më për të luajtur. Para se të bëni diçka kaq të rëndësishme, mes tjerat duhet ta bëni një plan strategjik për të ardhmen, ku interes do të ketë e gjithë komuna, jo vetëm sporti. Duke e parë rëndësinë e sportit në këtë kohë, e sidomos futbollit në Evropë, duket ta kemi parasysh dhe të punojmë në këtë drejtim që pas disa viteve KF. RAHOVECI mund të marrë pjesë në gara evropiane, kjo i bie që klubet evropiane dhe tifozët potencialisht vijnë në Rahovec. Çfarë përshtypje i japim ne, me atë idenë tuaj për stadium?... Ai mundet me qenë vetëm një stadium i zakonshëm i përshtatshëm dhe i rrethuar me male. Duhet të bëjmë diçka të veçantë – mund ta bëjmë. Stadiumi me mundësi duhet të jetë sa më në qendër të komunës. Ne si grup kemi një propozim konkret për stadium, veçse duhet vullnet nga ana e kryetarit dhe gatishmëri nga ana e asambleistëve. Rahovecit është vend bujqësor, veçantinë ia shtojnë sipërfaqet me vreshta, me rreth mbi 2000ha. Pjesa më e bukur dhe më strategjike është pjesa qendrore e “Stone Castle”, një hapësirë e gjatë me vreshta. Aty po bëhet një resort, një investim i madh që është në interes për komunën tonë. Visitorët që do të vijnë në Rahovec, kuptohet që do të jenë me mbresa, pasi që para vetes shohin hapësirën e bukur të ndërtimit të rrethuar me vreshta. Ne propozojmë që stadiumi i Rahovecit të bëhet në atë lokalitet. Pra, visitorët nga e gjithë Kosova dhe jo vetëm, pasi të vijnë në Rahovec të mos flasin vetëm për lojën por edhe për bukurinë e Rahovecit, si rrjedhojë ata do të vijnë prapë. Do të jetë një formë zingjirore e zhvillimit të asaj pjese, resorti – hardh festi – stadiumi, pra imagjinojeni se si do të duket një stadium në mes të vreshtave – do të ishte stadiumi më i veçantë jo vetëm në Kosovë. Poashtu, ju kryetar e keni pasë si premtim elektoral agroturizmin, plani për agroturizëm mund të niset me këtë projekt. Kjo ishte për pamjen e bukur, veçantinë dhe zhvillimin. Çasja për banorët e komunës dhe Kosovës do të jetë shumë më e lehtë sepse ajo pjesë është në periferi të qytetit por gati në qendër të komunës. Do të jetë stadiumi i komunës që pos qytetit do t'i ketë afër të gjitha fshatrat e komunës, Fortesa, Xërxa, Sapniqi, Malësia, Ratkoci, gjithë Anadriana si dhe pjesa tjetër; Celinë, Krushë, Nagac, Brestoc, Hoqa. Pra do të jetë stadiumi i komunës për të gjithë komunën që poashtu aty është duke u rregulluar një rrugë me katër korsi që do të jetë lehtë e çashme për të gjithë. Nga autostrada, vozitësi i bie ta ndërroj anën dy herë që të mbërrij në stadium (ata që janë mysafirë). Nuk ka dyshim që është një lokacion më i përshtatshëm dhe me interes për komunën. Një detaj tjetër për fund, duke iu referuar një shkrimi të Asociacionit Ndërkombëtar për Sport dhe Rekreacion, sugjerohet që stadiumet moderne të kenë tre parakushte që të jetë të

qëndrueshme dhe stabil; Mjedisi, biznesi dhe komuniteti. Ky lokacion i përmbush këtë parakushte, ju lutem merreni parasysh këtë propozim.

Sejfullah Sejfullahu – Përshëndetje kryesues, kryetar, drejtora, kolegë asambleistë. Urime festat e nëntorit. Po kaloj prej temës në temë, por kemi shumë telashe me qentë endacak, na duhet një zgjidhje sa më e shpejtë. Nuk e di komuna si e ka të rregulluar këtë çështje, por duhet të bëjmë zgjidhje. Tash në ora 16:00 në mbrëmje terrohet, fëmijët janë në shkollë deri vonë dhe kemi shumë probleme, sidomos tani që është “shtrenjtuar mishi” janë bërë më agresiv.

Burim Krasniqi – Përshëndetje kryesues, kryetar, ekzekutiv, kolegë asambleistë, të gjithë në sallë. Kryetar, i kam vetëm dy çështje që mendoj që janë shqetësuese. E para; Kam informata që është duke u punuar rreth rikthimit të një gurthyesi në dalje të Rahovecit në drejtim të Opterushës (mbi pompën e benzinës Fatmiri Comerc). Ka qenë dikur, është jofunksionale, por kam informacione që kanë filluar shpimet për rikthim të atij gurthyesi. Mendoj që nëse funksionalizohet prapë, do të jetë një gjë jo e mirë për komunën në përgjithësi dhe shumë shqetësuese në çoftëse planifikojmë ta zhvillojmë zonën industriale atje, e gurthyesi ta jep imazhin më të keq edhe hyrjes së qytetit por edhe asaj zone komplet. Do të ndodh ndotja e ambientit dhe një gjë e shëmtuar, shembullin më të thjeshtë e kemi rrugës për Malishevë para se të hyjmë në Astrazub. E dyta; Çështja e pagave jubilarë dhe çështja e tri pagave pas pensionimit. Unë e kuptoj që komuna nuk mund ta përballojë kontratën kolektive sa i përket shujtave dhe udhëtimeve, për shkak të akumulimit të borgjit që ka ndodh dhe rregullimi jo të mirëfillt në mes qeverisë dhe komunave për koston që e ka dhe si rezultat i kontratës kolektive të nënshkruar nga qeveria. E di që ka padi për atë pjesë, por tri pagat pas pensionimit i takojnë secilit të punësuar - arsimtar dhe ka prej tyre që presin dy vite dhe ende nuk iu ka realizuar, si dhe kam informata që ka realizim selektiv, dikujt i paguhen e dikujt jo. Paga jubilarë nuk është kosto e përealizuar, nuk është situatë që vjen befasuese, sepse për secilin shërbyes civil ose punëtorët e arsimit dhe shëndetësisë janë në dijeni kur e bëjnë pagën jubilarë dhe planifikohet në buxhet. Kërkoj që si komunë të ndërmerri masa me autoritetin që e keni fillimisht me gurthyesin që të mos lejohet funksionalizimi dhe të kujdeseni për obligimet rreth pagës jubilarë dhe për tri pagat pas pensionimit, e di që ka padi në gjykatë si dhe ka prej atyre mjekëve prapë edhe një kontest tjetër gjyqësor rreth pagës jubilarë dhe është në procedurë përmbartimore.

Sinan Kryeziu – Faleminderit kryesues, përshëndetje për të gjithë të pranishmit në sallë. Desha ta parashtroj si pyetje poashtu edhe si koment; Fillimisht po iu përkujtoj që komuna e Rahovecit ka lidhë kontratë me përfaqësues ligjor privat për t'i mbrojtur interesat e komunës. Në atë kohë pata propozuar prishjen e kësaj kontrate sepse e kam gjykuar që ka qenë e dëmshme. Në seancën e radhës në mënyrë zyrtare kisha dashtë të kërkoj nga komuna që të na prezantojë në mënyrë të shkruar të arriturat e këtij avokati që e ka marrë kontratën 50.000euro për shërbime 6 mujore, si dhe rezultatin që e ka arritur komuna që e ka lidhur këtë kontratë. Nuk e di sa jam i kjashtë, unë jam munduar me të gjitha format e mia që ta ndali këtë kontratë të dëmshme, por kryetari pat thënë që jemi vonë për këtë kontratë, është dashur ta lidhim prej 2011-tës me një avokat privat, pavarësisht asaj që i kam thënë kryetarit që i ka 5 jurista për përfaqësim rreth interesave të komunës. Kështuqë më jipet e drejta e “dynjasë” t'i kërkoj rezultatet dhe të arriturat në mënyrë të shkruara se çka kemi përfituar ne prej kësaj kontrate me këtë avokat privat. Shpresoj që në seancën tjetër do t'i kemi shkresat.

Eqrem Spahiu – Faleminderit kryesues, përshëndetje për të gjithë. Do të flas në emër të banorëve të Opterushës, Zoqishtit dhe Retijës për disa shqetësime që i kanë rreth fshatit. Në një lagje të fshatit Opterushë (aty ku shtrihet rruga për Retijë) ka probleme të mëdha me rrjetin e rrymës, nuk ka rrymë të mjaftueshme, si pasojë e kësaj aty duhet të punëhet çdo gjë me korrektor. Është kërkuar ndihmë nga KEDS-i por nuk ka pasë reagim asnjëherë. Në rrjetin elektrik aty që nga pas lufta nuk është bërë asgjë, rrjeti është nëpë shtylla të drurit të vendosura nga vet banorët. Probleme kanë edhe me ujë të pijshëm. Rrjeti i dobët i ujit dhe KRU – Gjakova nuk reagon fare për sanim. Shumë probleme do t'i kemi, sidomos tani gjatë kohës së dimrit. Tjetër problem në fshatin Opterushë

është edhe kanalizimi, disa pjesë të lagjeve nuk janë të përfshira në kanalizim, prej atyre është edhe restoranti që është hapur “Panorama” që po pritet të hapet edhe një tjetër, kanalizimin e hedhin nën asfalt. Ky kanalizim shumë shpejt do të vie edhe në fund të fshatit nëpër prrockën që është punuar në vitin 2020. Problemi tjetër është te përrocka, kryetari e din që është punuar shumë mire, por kanë mbetur edhe 60 metra pa dalur në rrugë dhe të përfundoj si duhet. Në një pjesë të përrockës derdhet kanalizimi dhe për fat të keq drejtori i shërbimeve publike është në dijeni. Problemi më i madh është në atë se në fshatin Optrushë, Zoqisht që dy vite asnjë metër rrugë fushore nuk është bërë. Problemi tjetër është në ambulancën e fshatit të cilën ka 5 muaj që e keni përruar, aty kemi një problem serioz, kanë filluar të myken muret. Aty nevojitet intervenim sepse dëmtimet do të jeni të mëdha prej lagështisë. Isha në inspektim aty në ambulancë kundërmon një erë e kanalizimit, mirë kishte me qenë që, une, ti, drejtoresha dhe Përparimi të shkojmë në mëngjes ta bëjmë hapjen e ambulancës dhe ta shohim nga afër se çfarë ere kundërmon. Ndriqimi publik pothuajse vetëm në mes të fshatit është si në Zoqisht ashtu edhe në Optrushë, nëpër lagje tjera nuk ka fare. Problemi tjetër qëndron te lapidari që është bërë në fshatin Retijë, kur do të fillon të punohet sepse ka mbetur vetëm betonimi.

Lirigzon Kastrati – Faleminderit kryesues, kryetar, drejtorë të drejtorive, kolegë asambleistë, përfaqësues të KFOR-it, qytetarë të komunës së Rahovecit. Në seancën paraprake unë e ngrita çështjen e rregullimit të shtratit të lumit, mirëpo nënkryetari me ekspres përgjigje tha që nuk kemi para, kur nuk kemi para nuk kemi çka bëjmë d.mth. kjo ishte përgjigja. Sa jodinjitoze por edhe e papranueshme çasja e ministrisë dhe e ekzekutivit në raport me mijëra qytetarë të komunës së Rahovecit për këto 5 fshatra; Brestoc, Hoçë e Vogël, Nagac, Krushë e Madhe dhe Hoçë e Madhe, për zvarritjen e projektit për rregullimin e shtratit të lumit. Ky projekt që ka nisur në 2019 është neglizhuar dhe nuk i është dhënë mbështetja e domosdoshme që e meriton, vazhdimisht në seanca e kemi ngritë shtetësimin e banorëve të këtyre lokaliteteve që për çdo vërshim ose punim ata kanë probleme me pronë. Deri më sot ende nuk kemi një përgjigje definitive për këtë projekt. Fakti që, një muaj më parë kryetari ka nënshkruar memorandum bashkëpunimi me ministrinë e infrastrukturës dhe mjedisit për financimin e projektit në vlerë prej 60.000euro është dëshmi e joseriozitetit përball vlerës financiare që kërkohet për përfundimin e këtij projekti. Kërkojmë nga kryetari i komunës konkretisht, ta dijme se çfarë obligimi ka komuna në këtë projekt dhe të na njoftoj se si do të vazhdoj shfrytëzimi i këtyre mjeteve. Është nevojë esenciale për këto lokalitete që ky shtrat i lumit të pastrohet fillimisht dhe të hiqen të gjitha ato pengesa që e pamundësojnë punimin e pronave. Çështja e dytë lidhjet me vërshimet. Kryetari i komunës e ka formuar komisionin për vlerësimin dhe kompensimin e dëmeve, besoj që kërkesën e ka bërë edhe në qeveri sepse dihet që qeveria duhet ta bëjë kompensimin. Kur kryhet ky kompensim i dëmeve kryetar?...

Vlora Vuçitërna Çmega – Faleminderit kryesues, përshëndetje për të gjithë. E kam një pyetje të shkurtë për drejtorinë e shëndetësisë. Si qëndron puna me ekipe mobile të posaçme shëndetësore të cilat i keni premtuar gjatë fushatës dhe që do të jenë në shërbim të qytetarëve?... A janë duke funksionuar këto ekipe?... Sepse sa kam informacione unë, ekipe mobile nuk ka për momentin, kjo për shkak të mungesës së stafit shëndetësorë. Nevoja për ekipe të tilla është e madhe. Nuk po i përmendi me emra, mirëpo X pacienta të paralizuar të cilët unë i njoh dhe i kam pacienta janë të detyruar që dikush t’iu bëj zgjidhje për një shërbim në nevojë.

Leonard Morina – Faleminderit kryesues, përshëndetje për të gjithë, kryetar, kolegë asambleistë, qytetarë. E kam një pyetje për kryetarin e komunës; Tenderi i hapur me 16.09.2022 për furnizim me dru për nevojat e komunës është mbyllur me 03.10.2022. Në këtë tender kanë ofertuar dy kompani, njëra me çmim 140.000, tjetra me 132.000euro. Këtu del që kontrata është nënshkruar me një operator tjetër dhe jo me këta dy ofertues që janë edhe në faqe të prokurimit. Një shqetësim të tillë e kam patur edhe në seancën e kaluar se si ofertuesi e ka nënshkruar kontratën me 159.000 përderisa kanë qenë dy ofertues më të lire për furnizim me dru. Dhe pse nuk është nuk faqe të prokurimit ky ofertues i tretë që e ka nënshkruar kontratën.

Edona Kryeziu - Faleminderit kryesues. I nderuari kryetar, kolegë kuvendarë, të gjithë tjerë që janë prezent në përcjellje të kësaj seance. Duke e parë që kohet e fundit është duke u investuar në shumicën e shkollave, një gjë që ka qenë mëse e nevojshme. Një fshat që është lënë anash është Zoqishti, shkolla e këtij fshati është komplet e demoluar. A ka shpresë që do të ketë investim në këtë shkollë? ...

Sejfullah Sejfullahu – Nuk dua ta teproj, por desha të pyes rreth varrezave të Celinës, kur do të vazhdojnë punimet sepse kanë mbetur shumë keq.

Kryetari – Përhëndetje kryesues, drejtorë të drejtorive, nënkryetar, anëtarë të kuvendit, pjesëmarrës nga LMT, nga OSBE, media, faleminderit për kontributin. Fillimit urime festën e shumëfishtë kombëtare, 28 nëntorin – Ditën e Flamurit, ditëlindjen e komandantin legjendar Adem Jasharit, ditën e themelimit të shtetit modern shqiptar 28 nëntor 1912, si dhe daljen publike të UÇK-së. Urime, nëntorat e ardhshëm çofshin me bilanc shumë më pozitiv sesa që e kemi tani. Lavdi për të rënë ndër breza për flamur dhe çlirimin e kombit.

Faleminderit Sefë, te varrezat e martirëve sivjet është bërë një punë, shpresojmë që të vazhdoj puna dhe jam i bindur që 25 marsi 2023 i gjithë projekti do të përfundoj.

Edona Kryeziu; Shkolla e Zoqishtit, Sapniqit, Pataqanit nuk janë ende të përfshira në projektin e eficiencës së energjisë, shpresoj çoftë me fondin e eficiencës, por çoftë edhe vet si komunë ne do të kemi një ndërhyrje për vitin e ardhshëm edhe të shkollës “Haki Stërmilli” në Zoqisht, në Pataqan, Sapniq por edhe te ndonjë shkollë që ka ngelur.

Leonard Morina ka folur rreth tenderit për furnizim me dru; E para, sivjet kemi një situatë shumë më pozitive nga pikëpamja e shpërndarjes së lëndëve djegëse nëpër shkolla. Fatbardhësisht nuk kemi pasë vonesa edhe për shkak të krizës globale e që kosotoja e shpenzimit të lëndëve djegëse është shumë shumë më e lartë. Ligji aktual i prokurimit në thelb e thotë këtë; Fitues i një aktiviteti të prokurimit është ai që është më i lirë dhe më i përgjegjshëm. Mund të jetë dikush më i lirë dikush, por nuk i plotëson kriteret ligjore me mungesë dokumentacioni. Tjetri mund të jetë më i shtrenjtë por i përgjegjshëm. Firma e parë dhe e dyta mund të jenë më të lira, fiton e treta për shkak se dy të parat nuk i plotësojnë kushtet në dokumentacion. Për ndryshe në seancën e ardhshme mund ta jap edhe përgjigjen më të plotë, në thelb kjo është përgjigja.

Vlora Vuçiterna, faleminderit për pyetjen. Ekipi mobil ekziston, është funksional. Veprimet e këtij ekipi mund të jeni të pamjaftueshme për shkak të numrit të punëtorëve të angazhuar. Këtë temë e kam trajtuar edhe në takimin që e kemi mbajtur me punëtorët shëndetësorë. Në seancën e ardhshme do t'i jap të gjitha informatat për arritjet konkrete si dhe sa shërbime i ka krye ekipi mobil nga 5 janari i këtij viti e deri në seancën e dhjetorit.

Te Lirgzon Kastratit rreth rregullimit shtratit të përroit Hoqë e Madhe, Brestoc, Hoqë e Vogël, Nagac, e deri në Krushë të Madhe, është projekt i financuar nga Ministria e Mjedisit Planifikimit Hapësinor dhe Infrastrukturës. Ngecjet në realizimin e këtij projekti janë shumë evidente dhe të dukshme. Projekti kushton rreth 1.390.000euro. Jemi kujdesur që kontrata t'i takoj dy kompanive, dy lotte dhe të kryhet më shumë punë. Unë me Ministrin Liburn Aliu e kam nënshkruar një momerandum në vlerë 60.000euro, të gjitha kanë qenë të planifikuara për këtë vit. Qeveria e Kosovës në një nga propozimet për ndarje buxhetore i ka hequr këto 60.000, tani me aneks memorandum janë rikthyer. Këto 60.000 që i kemi, i kemi lutur të dy kompanitë, a po dilni në punë t'i shpenzojmë të paktën këto?... Tani e kemi amandamentimin e ligjit për buxhet që ka kaluar në lexim të parë dhe shpresojmë shumë, nëse jo, ne jemi duke e shqyrtuar mundësinë financiare që këtë projekt ta realizojmë vet si komunë, në çoftëse ligji për buxhet për vitin 2023 kalon pa këtë projekt në të. Kemi shpresuar që është gabim teknik. Si ka mundësi të hiqet një projekt i cili është i financuar nga ministria qe tre vite. Realizimi i këtij projekti i jep zgjidhje të gjithë problemeve që aktualisht ballafaqohen qytetarët e atyre zonave.

Te Eqrem Spahiu; Udhëheqësit kryesor të KEDS-it kanë qenë në zyrën time në nivel vendi. Ata e kanë një plan të investimeve që fillon nga viti 2024. Në 2023 vetëm qka mund të nxjerrim, duke iu bërë presion, e duke i sfiduar. Te uji i pijshëm; Ministria e Zhvillimit Ekonomik asnjë cent nuk ia ka dhënë KRU-Gjakovës. Kemi një ngecje

serioze nga pikëpamja e synimeve të investimeve konkrete nga KRU-Gjakova. Shpresoj që do të ndryshoj situata për Optrushën, Zoqishtin, Hoqën e Madhe dhe për zonën ekonomike, poashtu edhe për Senocin, Drenocin. Këto dy projekte që janë të gatshme dhe siç e dini, zotohem që në momentin kur KRU-Gjakova është gati për intervenime, ne jemi gati gjithashtu, sepse ata janë iniciues të procedurave në projekte. Ne do të kërkojmë ndërhyrje sidomos kur ka reshje në Optrushë dhe në ato zona ku furnizimi me ujë të pijshëm nuk bëhet KRU – Gjakova, por që janë asate në menaxhim të KRU-Gjakovës. Restoranti “Panorama” është restoranti më i mirë që tani e ka komuna e Rahovecit. Problemi me kanalizim; Është një lajm i mirë që Ministria për Tregti Ndërmarrësi dhe Industri, e ka shpallur njoftimin paraprak për zonën ekonomike, 1.8 milion janë para që 1.5 milion i paguan shteti, ndërsa 300.000 euro komuna, edhe pse projekti kushton më shumë, por kjo ka qenë mundësia buxhetore e ministrisë. Ata i kanë inicuar procedurat, ata do të udhëheqin me gjithë procesin, kurse ne do të jemi në cilësinë e vëzhguesit dhe me memorandum mirëkuptimi i kemi edhe kontributet tona. Në këtë projekt punët e para që do të bëhen janë; Kanalizimi i ujërave të zeza, rrugët dhe trafoka. Në Rrugët fushore në zonën Optrushë, Zoqisht dhe Retijë, këtë vit kemi pasë ngecje poashtu edhe në Krushë të Madhe, Celinë, Hoqë e Vogël, Nagac, Brestoc, gjithashtu edhe në qytet, sepse nuk është turp të themi që operatorët kanë qenë më të lodhur, arsyetimet tashmë dihen – rritja e çmimeve. Te problemi i QMF-së, shqetësimi është i adresuar, operatori “Etniku” zyrtarisht i ka marrur përsipër të gjitha ndërhyrjet që do të bëhen. Të Kompleksi memorial në Retijë, ne e kemi shkëputur kontratën me operatorin e “vjetër” i cili për 5000 euro punë nuk e ka kryer projektin. Fatbardhësisht e kemi lidhë kontratën e re dhe sivjet kryhet. Sinan, ne kemi kontratë ligjore me një avokat privat. Me procedur të prokurimit kanë aplikuar përfaqësuesit ligjor (avokatura) dhe dikush e ka fituar. Në thelb mund të iu them, që dikush në QMF e ka bërë një padi dhe i ka fituar mbi 80.000 euro nga kategoria mallra dhe shërbime, falë avokatit me të cilin ti rrin çdo ditë me të, e unë më rrallë, e kemi fitu të drejtën (e kemi rikthyer). Pra, kemi disa momente ku ne i kemi fituar betejat ligjore në interes të komunës së Rahovecit. Kontrata që ka qenë për 6 muaj, nuk i ka shpenzuar as gjysmëm, sepse ai më raporton në baza mujore. Pavarësisht asaj që ne kemi jurista edhe këtu në asamble dhe shumë mirë që ka, por nuk është e lehtë të mbrojmë ligjërisht, të fitojmë ligjërisht shumë beteja që mund t’i ketë komuna jonë në raport me subjektet fizike e juridike, prandaj komunat krijojnë marrëdhënie kontraktuale me sektorin privat. Ne i kemi 5-6 jurista, por ata kanë punë tjera që duhet bërë. Padia merr kohë dhe kapacitete tjera. Burim Krasniqi rreth gurthyesit i cili e ka marrë licencën nga institucionet tjera, jo nga komuna sepse komuna nuk lëshon licenca. Është penguar nga komuna, kemi patur një takim në zyrë, vendimi ynë është që nuk i lejohet atij të vendos makineri. Kjo çështje është duke u diskutuar edhe në nivele tjera dhe këtë vendim nuk e kemi ndërmend ta ndryshojmë sepse qëndrimi jonë është i përcaktuar në vendimin e drejtorisë së urbanizmit. Pagat jubilarë; Në informacionet që unë i disponoj, ka plotë mësimdhënës që janë trajtuar, ka edhe prej atyre që nuk i kanë marrë pagat jubilarë. Veprimet selective; Po, një baba i dëshmorit Mustafë Hoti, jam munduar të ndërhyj, t’ia japim para kohe për shkak të gjendjes shëndetësore të gruas së tij. Në fund nuk u realizua. Pra, ka një renditje që lidhet me datat kur dalin në pension. Ne jemi të interesuar çdo herë t’i japim pagat jubilarë përkundër asaj që na ka ardhur vendimi zyrtarisht për shkëputjen e kontratës kolektive nga MASHTI. Na vie keq për ata që nuk i kanë marrë ende e që presin t’i marrin. Sejfullah Sejfullahu për qentë endacak; Ne e kemi pasë një projekt dhe veprime më herët për qentë endacak. E kemi zvogëluar numrin e tyre duke marrë veprime legale, mirëpo tash dikush thotë, po i bijnë prej Serbisë, dikush prej komunave tjera dhe prap ka filluar numri i tyre të rritet. Do ta shqyrtojmë me shumë vëmendje këtë çështje. Për fund e kam lënë Ilir Pallqën (qershia mbi tortë). Ministrin Liburn Aliu e kam takuar këtu, më është zotuar që për shkak të përmbytjeve dhe vërshimeve të gjitha kontratat që i kemi në rregullim të shtretërve, lumenjëve, kanaleve të kullimit dhe drenazhimit e tokave bujqësore, do të ndërhyjmë me një program të veçantë dhe të gjitha do t’i marr përsipër unë. E kam kuptuar jashtëzakonisht ambicioz këtë deklaram të tij dhe kam besuar që ky ka fuqi, mundësi dhe instrumente ta dëshmoj këtë punë. Çka ka ndodh?... Kur ka kaluar buxheti në qeveri, lëre që nuk ka hy asgjë, por është hequr edhe projekti për të cilin folëm, lëre që

Është hequr ai, por është hequr edhe stadiumi i Rahovecit si projekt. Kodi për stadiumin e Rahovecit, kodi për palestrën sportive në Krushë të Madhe, kodi për stadiumin në Krushë të Madhe dhe kodi për stadiumin në Ratkoc. Shpresoj që në leximin e dytë mund të rikthehet diçka, prandaj nuk kam folur publikisht sepse nuk kam dashur ta krijoj një situatë “të flas para kohe”. Stadiumi te Epopeja e UÇK-së; Prona ka qenë e menaxhuar nga agjensioni pyjor i republikës së Kosovës. Në kohën e qeverisjes Haradinaj i kemi marr 7 ha dhe i kemi kthyer në pronë komunale. Në atë kohë ministër i Kulturës Rinisë dhe Sportit ka qenë Kujtim Gashi (PDK) dhe luftën më të madhe e kam bërë që mos të lejohet të investohet në stadiumin ekzistues në qytet. Sepse e kemi ditur që do të bëhet sheshi, kemi luftuar për vend dhe kemi arritë t’ia mbushim mendjen ministrit Gashi për një vend tjetër. Iliri e din që ne kemi hulumtuar shumë seriozisht, e kemi parë që prona publike për stadium në qytet nuk ka, mund të ketë pas 50 viteve në çoftëse e marrim përsipër ta rrënojmë ndonjë lagje në qytet. Prona në periferi të qytetit nuk ka, kërkon çasje në drejtori të gjeodezisë dhe kadastrës dhe në program i shihni se ku janë pronat e komunës, të agjensionit pyjor apo edhe të Agjensionit Kosovar të Privatizimit që janë në menaxhim. Ne nuk kemi pronë as për skaj rrugës për Xërxe. Nuk kemi pronë në rrugën për Malishevë dhe nuk kemi prone në rrugën për Drenoc, as në rrugën për Pataqan. Kemi pronë në rrugën Rahovec-Suharek te zona ekonomike. Te Epopeja e kemi gjetë pronën, e që është përcaktuar vendi për stadium. Ministria për Kulturë Rini dhe Sport ka krijuar marrëdhënie kontraktuale me një operator për hartimin e projektit (matjet gjeodezike). Është hartuar projekti ideor dhe kryesor, janë paguar mjete financiare për këtë projekt, kanë filluar procedurat e prokurimit, madje është shpallur edhe fituesi, nuk e di pse është anuluar procedura e prokurimit e tani janë hequr edhe kodet. Smajl Latifi nuk ka vendosur se ku do të bëhet stadiumi, kish pasë qejf vet është boll i zoti, por nuk ka fuqi vendim-marrëse se ku do të bëhet stadium. Ndërsa Smajl Latifi në cilësinë e kryetarit të komunës në process e ka gjetur mezi një pronë që e ka bërë pronë komunale, mos harro, është arritje sepse prona ka qenë e agjensionit pyjor, tani është e komunës – 7 hektar. Ne e kemi këtë pronë komunale për stadium, ndërkohë ka lind një ide interesante nga Ilir Pallqa, të cilën e kemi diskutuar me Ilirin, Visarin, kryesuesin dhe plotë tjerë. Te Stone Castle; Është tokë bujqësore, tokë që duhet të ridestinohet të bëhet tokë për ndërtim, sepse stadiumi është ndërtim dhe me do arsye që unë i kuptoj shumë mire. Ministria na ka hequr projektin e në anën tjetër kërkojmë shpronësim, kompenzim që kushton 3-4 milion, edhe pse ndoshta pronari nuk ka fare vullnet për ta dhënë dhe Iliri thotë që a ka vullnet kryetari. Vullnetin për stadium të kategorisë së parë e kam, bile me mundësi kampionatin botëror do ta organizoja në Kosovë, mundësisht 3-4 ndeshje në Rahovec. Iliri thotë ti e ke punët mirë me Stone Castlen, unë e kam mirë me të gjithë, bile edhe me Ilirin. Po nuk mund t’i them një pronarit që e ka në menaxhim 99 vite, ma jep këtë parcelë falas ndërkohë kur ka shku dikush prej këtyre të flas me ta, është folur për shpronësim. Nuk mund t’i them qytetarëve të Rahovecit me kaq pakujdes që flet Iliri, që Epopeja e UÇK-atje mbi Rahovec është stadium për Malishevën, ndërkohë që ajo zonë po urbanizohet me kompleksin sportiv, me shtegun e ecjes, është infrastruktura, rryma dhe uji, është Maja e Shkodranit etj. Në këtë situatë fatkeqësisht nuk e ka prioritet stadiumin, sepse e kanë hequr kodin dhe shakatë pa kripë të Ilirit ose të ndonjë Iliri tjetër nuk shkojnë te unë, sepse kodi është hequr nga qeveria dhe luftën më të madhe e kam ta rikthejmë, në vend që të luftojmë për një projekt të ri. Nuk po them që këto projekte i ka heq Liburn Aliu ose Hajrullah Çeku, po ndoshta ministri i financave. Në moment kur rikthehet kodi për stadiumin në Rahovec, për stadiumin në Ratkoc, për palestrën sportive në Krushë, për stadiumin në Krushë, tani flasim për vende se ku do të mund të bëhet stadiumi. Shqetësimi është me vend, mirëpo momenti jo. Lajm i mirë në buxhet është që shtohen vendet e reja për dukatore për qerdhe dhe numri i punëtorëve shëndetësor. Ndërsa mos harro Ilir, qerdhja në qytet është dashur të filloj sivjet, sikurse në Gjakovë, mjetet për qerdhe kanë qenë të ndara. Është mirë të reflektoni edhe ju. Shkolla në Pastasel është dashur të fillor sivjet, sikurse në disa komuna. Faleminderit për durimin, jam përpjekur të jap sqarime sa më të paanshme, të drejta dhe korrekte.

Ilir Pallqa – Kryetari ka fol pak gjatë dhe e kemi problem t’a përfshijmë krejt. Po ta bëj me dije që 50 minuta ke fol. (Kjo është kritikë për ty kryesues). Projektin e stadiumit ia lëjmë në përgjithësi ministrit dhe e thërrasim atë në

përgjegjësi. Unë kam folur për lokacion. I ke marr 7 hektar te Epopeja, ke pasë mundësi edhe 100 m'i marr, sepse në të ardhmen mund të bëhet çdo gjë atje, për stadium nuk është i përshtatshëm, i kam cekur arsyet e mia. Ne nuk duhet t'i shikojmë pronat a janë publike apo private, si institucion jemi këtu për interes publik dhe interesi publik mund të jetë edhe në prona private, për këtë arsye ekziston ligji për shpalljen me interes të përgjithshëm publik në prona private. Sa i përket ridestinimit të tokës bujqësore, ka precedent në po atë pjesë me të njëjtin pronar. Me 30 maj 2018 janë ridestinuuar 97 ari nga toka bujqësore në tokë ndërtimore në këtë kuvend, në të njëjtën pjesë, me të njëjtin pronar. Për interes privat është dhënë pëlqimi për ndërtimin e Resortit dhe tani jeni në hamendje se a e jep pëlqimin ministria për interes publik?! A e jep falë? Nuk e di a e jep falë, por ka precedent që e ka dhënë falë për trafon e rrymës dhe për shkollat në Pataqan. Mendoj që duhet të shkosh për diskutim te ai, t'ia shfaqësh si interes reciprok sepse edhe atij i zhvillohet ajo pjesë duke iu rritur vlera asaj prone, besoj që edhe ai ka interes që stadiumi të ndërtohet atje. Ne, përmes deputetit tonë, kemi bërë çmos për adresimin e këtyre projekteve në leximin e dytë të buxhetit siç edhe jeni në dijeni kryetar.

Kryetari – Interesi publik mbrohet edhe duke e trajtuar sektorin privat. Çështja e shpronësimit është e rregulluar me ligj. Mendoj që interesi publik përfaqësohet më mirë kur e kemi pronën publike dhe interesi privat ose parcelat private vijnë në shprehje kur skemi pronë publike dhe tani duhet të bëjmë marrëveshje shpronësimi për interes publik etj etj... Këndvështrimi i dikujt mund t'i duket që nuk është interes publik te Epopeja e UÇK-së. Në çoftëse nuk është interes publik për stadiumin, pse atëherë po e ndërtojmë kompleksin sportiv atje, shtëpia për të moshuar, Maja e Shkodranit, restorant "Bjeshka" dhe nuk është dashur hiç t'ia marrim sektorit pyjor ata hektarë. Vend tjetër publik në Rahovec nuk ka pos atij. Unë kam biseduar me ta, the për trafon – sa i përket trafos mu në atë vend është gjykuar dhe vlerësuar të bëhet ajo trafo dhe e ka dhënë falas. 2 hektarë tjerë për shkolla në Pataqan të Epërm, gjithashtu falas, mirëpo ti nuk po i kërkon pronë për varreza të dëshmorëve të martirëve apo edhe për civile, apo edhe për sistem të ujitjes e as për Teqe e Xhami sepse ta jep. Për ridestininim në atë kohë ka folur kuvend i komunës por gjithashtu edhe ambasadori i SHBA-së në republikën e Kosovës Greg Delawie, i jashtëzakonshëm dhe fuqiplotë. Ndërsa sot as ministri Çeku nuk flet për këtë punë, sepse është hequr komplet kodi, të gjitha projektet që kanë qenë. E nëse flet ministri, flet edhe kryeministri por edhe ambasadori i ri Jeffrey Hovenier dhe të siguroj që këta mund ta ndihmojnë edhe ridestinimin dhe më pas zëri im ka me qenë shumë i fortë. Dikush në emër të juajin ka folur dhe ka thënë shpronësim dhe shpronësimi në atë vend dhe në ato kushte dihet sesa kushton. Të lutem Ilir, po flet në emër të sportit dhe në emër të qytetarëve të Rahovecit me rreth 300 vota, e unë nuk po "guxoj" të flas dhe për atë arsye po foli para juve në kuvend edhe pse i kam 11.000 vota. Ju lutem mos folni në emër të qytetarëve dhe sportistëve pa e ditur mirë mendimin e tyre. Mos e gjykoni një veprim të kryetarit të komunës, pa qenë të informuar drejtë. Ju siguroj që kompleksi sportiv që po ndërtohet atje, e që pritet vitin e ardhshëm të kryhet, sipas federatës së futbollit i plotëson më shumë kushtet sesa stadiumi ekzistues. Ata i bëjnë matjet dhe kriteret – janë kompetent, e jo Ilir Pallqa e Smajl Latifi.

Lirigzon Kastrati – Kryetar, pyetjen e dytë që e bëra ishte rreth kompenzimit të dëmeve për shkak të vërshimeve, e di që raportin e keni dorëzuar, por a e keni ndonjë informacion se kur do të mund të bëhet kompenzimi?... Sepse është kërkesë dhe adresim i disa bujqëve por edhe i ekonomive familjare.

Kryetari – Më fal Lirigzon, pyetjen tënde e kam shënuar, por më doli nga mendja. Ne, raportet i kemi përgatitur herët, por ka qenë një paqartësi te ministritë e lindjes. E kanë bërë një udhëzim dhe një rregullore për trajtimin dhe vlerësimin e dëmeve në bujqësi dhe tani ata na thonë; Ju e keni formuar komisionin ende pa e patur udhëzimin administrativ. Në fakt ata e kanë vonuar udhëzimin administrativ, ne nuk mund t'i vlerësojmë dëmet në bujqësi pas 3 muajve, por duhet të vlerësohen në ato ditë kur kanë ndodhur vërshimet, sepse dëmet do të asgjësoheshin me kohë. Megjithatë na kanë dërguar disa formularë të rinj dhe i kemi plotësuar. Është një komision shtetëror për vlerësimin e dëmeve në bujqësi, amvisëri, ekonomi familjare, infrastrukturë publike dhe biznese. Vetëm një e

dijmë, besoj që ka ardhur koha që ndoshta brenda dhjetorit ta marrin vendimin për vlerën financiare të kompensimit. Jemi në pritje. Shtatë komisione e kanë kryer punën në mënyrë profesionale.

Hasan Përboqi – Faleminderi kryesues. Përshëndetje kryetar, kryesues, nënkryetar, drejtor të drejtorive, kolegë asambleistë, media të pranishme. Realisht desha të inkuadrohem në çështjen e diskutimit rreth leximit të parë të buxhetit të qeverisë i cili ka kaluar javën e kaluar në parlament të Kosovës. Duhet të jemi në dijeni se çka ka hequr kjo qeveri, e çka ka shtuar rreth komunës së Rahovecit. Nuk bën ta harrojmë se kjo qeveri me 14 shkurt i ka marrë 51% të votave në nivel vendi e në Rahovec mbi 10.000. Nuk bën me harru fakti as pas çdo vërshimi që ka ndodhë prej 14 shkurti e këndeje, kjo qeveri është “knaq” duke bërë fotografi nëpër toka bujqësore e terrene të fshatrave. Ta shohim tani se si po implementohet buxheti i vitit 2023. Një fakt që unë tash për herë të parë e dëgjova që stadiumi qenka hequr, ndërkohë që ne po luftojmë për ndonjë projekt të ri në buxhet. I bashkangjitem bisedës së kolegut Ilir dhe mendova të kontriboj në diskutim për stadium, e tash po del që stadium është hequr. Kjo i bie “Peshku n’deti – fërterja n’zjem”. Kjo çështje rreth buxhetit që është shumë me rëndësi, po e lë ta diskutojmë për seancën tjetër, pasi që kolegu asambleist tha që presim që në leximin e dytë të rikthehen projektet e janë hequr dhe të shtyhen tutje projektet e reja. Në rast se kjo nuk ndodh, kisha propozuar ta bëjmë një seancë të jashtzakonshme ne si kuvend dhe të diskutojmë rreth kësaj padrejtësie që po i bëhet Rahovecit si komunë. Pse po hiqen paratë e vitit 2023 që kanë qenë të planifikuara për qerdhen në qytet, e po dërgohen në Kamenicë?... A jemi edhe na pjesë e Kosovës dhe taksapagues në atë buxhet?... Po e lë këtë diskutim për seancën tjetër, duke shpresuar që kalon buxheti edhe në lexim të dytë në parlament dhe atëherë dihen konkretisht gjërat. Prej kryetarit kisha kërkuar, nëse paraprakisht para seancës tjetër kalon në lexim të dytë buxheti, të na përgatit një dokument që të jemi në dijeni për të gjitha ato se çka përmban buxheti e çka jo, për komunën tonë.

Kryesuesi – Faleminderi shumë Hasan. Me gjithë respektin, por unë besoj që kompetencat e kuvendit komunal të Rahovecit janë që të mirremi këtu me çështje lokale. Kemi shumë probleme brenda komunës, çoftë infrastrukturë, çoftë probleme tjera të përditshme që jemi duke i përjetuar në komunë. Te çështja e buxhetit; Është Parlamenti i Kosovës që merret të, e kemi një deputet atje dhe mund të bëjmë kërkesë duke i shfrytëzuar të gjitha format ligjore. Nuk besoj që është e arsyeshme që këtu t’a diskutojmë buxhetin e Republikës. Sa i përket largimit të kodit për stadiumin, raste të tilla ka pas edhe gjatë qeverisjes Haradinaj, nuk është vetëm çështja që tash Vetëvendosja e ka qeverinë. Pavarësisht kësaj, nuk besoj që ia vlenë që këtu në kuvend komunal t’i diskutojmë çështjet e kuvendit të Kosovës.

Sejfullah Sefullahu – Është shumë shqetësuese dhe irrituese kjo gjendje. Mirë është të diskutohet dhe të gjithë ta përdorin ndihimën tonë të Avdullah Hoti, të Visar Korenica edhe të Yllza Hoti nga Krusha, e që identifikohet si e Prizrenit. Është shumë shqetësuese që për Krushën e Madhe dy projekteve më të mëdha iu kanë hequr kodet, stadiumit dhe palestrës sportive dhe më vie keq që sot e kuptova këtë gjë. Duhet protestë dhe grevë urie. Fjalën e kërkoja që kryetarit t’ia bëjë një pyetje shumë relaksuese, por ja që nuk po ia bëj pasi e kuptova këtë gjë, u irritova shumë.

Kryesuesi – Pajtohem plotësisht me kritikën e tua, por drejtimi i tyre është i gabuar. Nuk dua ta amnistoj çështjen e kodeve dhe investimeve, por në kërkesat që i kemi si komunë, unë rreshtohem gjithmonë krah juve.

Hasan Përboqi – Të kemi kryesues, të kemi shok-mik e bashkëvendas, por ajo që the është shumë e pakuptimtë. Mos t’i diskutojmë këtu?... Nëse komuna nuk ka kapacitet që prej buxhetit të vet ta ndërtoj stadiumin, atëherë është shumë normale të kërkojmë ndihmë prej qeverisë. Kolegu Iliri poashtu e ngriti çështjen e stadiumit, edhe atij është dashtë t’i thoni njëjtë si mua sepse stadiumi është kompetencë e qeverisë për ndërtim. Nuk besoj që është e drejtë që t’i thoni një asamblesiti këtu që çështjet që janë të lidhura me buxhet dhe interes të qytetarëve nuk bën të diskutohen në asamble. Pikërisht kjo seancë është mirë që po zhvillohet në kohën e dy leximeve dhe është mirë t’i diskutojmë gjërat. Lehtë është që opozita ta kritikoj kryetarin për shumë gjëra, por duhet pranuar edhe kjo që ne po e kërkojmë prej qeverisë, nuk po kërkojmë asgjë ekstra, por pasi ka të drejtë që një stadium ta bëjë në Gjilan,

Mitrovic, Prishtinë e pse në Rahovec jo?... E kemi rrugën katër korsi dhe që dy vite prej kësaj qeverie po barten mjetet. Këto janë problematikat, inate personale nuk kemi me askënd.

Kryesuesi – Atëherë përshëndetje edhe një herë për të gjithë. Më vie keq që ky diskutim po bëhet në këtë formë edhe pse e kemi pa të arsyeshme të marrim pauzë prej 12:00-13:00 për shkak që e kemi një promovim të një libri të profesor Sabaudin Cenës prej orës 14:00. Ju sugjeroj që diskutimet t'i bëjmë më të shkurtëra që seancën ta përfundojmë në orën dy. Sa i përket çështjes së investimeve, Iliri foli për lokacionin e stadiumit – jo për stadiumin. Është e pakuptimtë nëse më sheh si “një dikushi” që jam pro asaj që është hequr një kod i stadiumit prej Ministrisë së Financave apo nga ajo e Kulturës. Në kërkesat për investime në komunën e Rahovecit gjithmonë rreshtohem me juve, por diskutimi për buxhetin e Republikës së Kosovës më duket i paarsyeshëm kur këtu mundemi t'i diskutojmë 100 telashe që i ka komuna e Rahovecit, duke ia përmirësuar jetën qytetarëve. Besoj që ne i përfaqësojmë qytetarët e komunës së Rahovecit për problemet këtu. E kemi mbajtur një takim me kryetarin, aty ka qenë deputeti dhe dy anëtarë të kuvendit të lëvizjes Vetëvendosje Sinani dhe Iliri. Kryetari i kemi thënë kështu; e E ke përkrahjen tonë të plotë për çdo kërkesë që e bën në qeverinë e Republikës së Kosovës që udhëheqet prej Albin Kurtit. Në çdo takim që mund të shkoj kryetari, ne shkojmë me të sepse interesi jonë është për investime në komunën e Rahovecit. Hasani e përmendi që ministrat kanë qenë dhe i kanë vizituar tokat bujqësore këtu, ministrat poashtu kanë qenë në zyrën e kryetarit në takimet që i kanë mbajtur. Pse kryetari asnjëherë nuk e ka ftuar një anëtar të kuvendit të lëvizjes Vetëvendosje dhe ta shihni çasjen tonë që ju nuk po i besoni, ndaj tyre për interes të komunës së Rahovecit. Akuzat janë të drejta, parimore dhe me interes të komunës së Rahovecit, por janë në drejtim të gabuar.

Kryetari – Këtu po diskutohet edhe për temat që në të vërtetë nuk janë kompetencë e jona, mirëpo ata që flasin duhet të provojnë të flasin saktë. Qeveria e Kosovës e ka një çasje tjetër t'i ruaj mjetet, inflacioni po bie, kriza po tejkalohet dhe do të kemi mjete të mjaftueshme për paga dhe për të gjitha projektet pas vitit 2025, kur ndoshta plotë qytetarë do të largohen nga këtu dhe do të mbesim këtu në kuvend. I sugjeroj kryesuesit të kuvendit që mirë është mos të bëj komente politike. Kryetari i komunës nuk bëri komente politike. Të ruhem nga kualifikimet partiake. Kënd e thirr kryetari i komunës kur e ka një ministër në takim, e kënd nuk e thirr, kjo nuk është çështje e një asambleisti ose e kryesuesit të kuvendit të komunës, pushtete janë të ndara. Edhe nëse janë 10 asambleista, kurrfarë kontributi nuk mund ta japin më shumë se sa kryetari i komunës. Nuk bëhet politika kështu kryesues, “demek” ne jemi më të fortë kur janë edhe asambleistat e VV-së në takim. Mos mendoni që ekskluziviteti i zhvillimeve në këtë vend i takon vetëm një partie edhe nëse i ka 60%, është kontribut i përbashkët. Nuk e kemi vetëm një deputet, deputet është edhe Avdullah Hoti, Yllza Hoti poashtu. Nëse dëshirojmë të punojmë, adresimi duhet të jetë te tre deputetët. Duhet ta kuptojmë edhe që Visar Korenica nuk është në kohën apo disponimin më të mirë, unë e mirëkuptoj. Unë kam qenë deputet 2001-2004, vet si LKÇK dhe më shumë është dëgjuar zëri im atëkohë sesa deputetëve që janë sot në grupe të mëdha politike. Zëri i Visarit ndoshta sot dëgjohet më pak, për shkak të situatave që nuk ia jap vetës të drejtën t'i komentoj. E kam takuar Visarin, shpresoj që do ta bëj punën e vet sepse për Rahovecit duhet të jemi gjithë bashkë. Sheshin nuk e kanë vendos në buxhet, unë ndoshta zyrtarisht do t'i kërkoj kryetarit të Prishtinës, Përparim Ramës të na jep një donacion për sheshin qëndror sepse ka qenë kryetar i jurisë kur është bërë përzgjedhja e objektit. Më ka premtuar që po, tani jemi duke i shqyrtuar modalitetet. Unë jam në pritje të lidhjes së kontratës dhe sheshi qëndror i qytetit do të kryhet. Sidoqoftë pavarësisht që nuk jemi kompetent, ne i apelojmë në emër të qytetarëve duke i kërkuar qeverisë së Kosovës dhe deputetëve, mbi të gjitha Komisionit Parlamentar për Buxhet - Punë dhe Transfere, në adresimin e çështjes që ka të bëjë me amandamentimin e ligjit për buxhet të rikthehen projektet e hequra dhe të futet ndonjë projekt i ri.

Kryesuesi – Faleminderit kryetar, gjithashtu edhe unë shpresoj që projektet do të kthehen. Për te çështja e takimeve, mos të keqkuptohemi, nuk jemi ftuar shkak që nuk jemi kompetent për çështjen. Ata kanë ardhur të takohen me kryetarin e komunës. Po e them këtë, që ju ta vërtetoni çasjen tonë ndaj qeverisë për interes të

komunës së Rahovecit sepse po na shikoni me një sy kinse ne nuk bëjmë asgjë ose po veprojmë qëllimshëm keq në dëm të komunës. Absolutisht jo, çasja jonë gjithmonë është fuqishëm në interes të komunës. Po vazhdojmë me një pauzë deri në ora 13:00...

Kryesuesi – Atëherë përshëndetje për të gjithë. I nderuar nënkryetar i komunës, të nderuar anëtarë të kuvendit komuna, drejtorë të drejtorive. E vazhdojmë kështu pjesën e mbetur të seancës së rregullt pas një pause pak të zgjatur.

3. Shqyrtimi dhe miratimi i propozim-vendimit për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës: P-02279-0, P-02280-0 dhe P-02281-0;

Afrim Oruqi – Faleminderit kryesues. Të nderuar anëtarë të kuvendit, sipas ligjeve dhe akteve tjera nënligjore, para jush keni një vendim për formimin e komisionit për zbatimin e procedurave për vlerësimin e ofertave të dhënies në shfrytëzim të pronës së paluajtshme të komunës. Komisioni sipas pikës 1 të këtij vendimi do të përbëhet prej 5 anëtarëve; 2 nga ekzekutivi, 2 nga kuvendi dhe një nga sektori joqeveritar. Bëhet fjalë për një komision i cili do të merret me procedurë për dhënien në shfrytëzim të tri parcelave; nr. P- 02279-0, P-02280-0, P-02281-0 në zonën kadastrale në Rahovec. Ftoj anëtarët e kuvendit që pas propozimit të emrave për komision, ta votojnë propozimin vendimin për formimin e komisionit.

Kryesuesi – Faleminderit shumë drejtor. Atëherë prej kuvendit të komunës në këtë komision do të delegohen 2 përfaqësues. I ftoj grupet e asambleistave për propozime.

Besë Bytyqi – Faleminderit kryesues, shfrytëzoj rastin ta përshëndes deputetin Visar Korenica. Grupi i Aleancës për këtë komision propozon Rumir Zhuniqi-n.

Leonard Morina – Grupi i Vetëvendosjes nuk ka propozim.

Lirigzon Kastrati – Në emër të grupit të asambleistëve të LDK-së e propozojmë z. Eqrem Spahiu-n.

Sejfullah Sejfullahu – Në emër të PDK-së, propozojmë dr. Amir Vuçiterna.

Kryesuesi – Meqenëse i kemi tre propozime, duhet të shkojmë me vota për secilin prej anëtarëve.

Burim Krasniqi – Meqenëse janë më shumë se dy emra, LDK tërhiqet prej propozimit.

Kryesuesi – Faleminderit shumë për mirëkuptimin. Atëherë për këtë komision kemi dy propozime; Rumir Zhuniqi (AAK), Amir Vuçiterna (PDK). Prej ekzekutivit gjithashtu i kemi gati dy propozime prej kryetarit.

Kryetari – Përshëndetje. Albtor Mullabazi dhe Nora Boshnjaku.

Kryesuesi – Atëherë përveq përfaqësuesit joqeveritar që do të zgjedhet pas thirrjes nga ekzekutivi, anëtarët e këtij komisioni janë; Rumir Zhuniqi, Amir Vuçiterna (kuvendi). Albtor Mullabazi dhe Nora Boshnjaku (ekzekutiv). Si të tillë po e vendosim në votim këtë komision. Kush është për?... Me shumicë votash aprovohet edhe komisioni për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës.

4. Shqyrtimi dhe miratimi i propozim-vendimit për ndryshimin dhe plotësimin e vendimit 01 nr. 1427 i datës 30.04.2019 për themelimin e çmimit për krijimtari letrare e artistike “Sulejman Krasniqi”;

Afrim Dina – Faleminderit kryesues, i nderuar kryetar, nënkryetar, kolegë drejtor, i nderuar deputet i republikës së Kosovës, të nderuar anëtarë të kuvendit. Para vetes keni propozim-vendimin e kryetarit të komunës për plotësim-ndryshimin e vendimit 1427 të datës 30.04.2019 për themelimin e çmimit letrarë “Sulejman Krasniqi”. Ky çmim ka për synim rritjen e interesimit për krijimtari letrare në komunën e Rahovecit. Kërkesa për plotësim-ndryshim të këtij vendimi, lidhet rritje dhe motivimin e krijueseve që marrin pjesë në konkursin letrarë dhe mbi këtë bazë synohet fuqizimi akoma më shumë i personalitet të madhit Sulejman Krasniqi. Duke ndryshuar shpërblimin financiar nga 500 euro sa ka qenë në vitin 2019 në 1000euro, synohet që të bohet masivizimi i kësaj gare. Poashtu në vendimin e vitit 2019 figuron shuma fikse që është në pikën 3 me 500euro për fituesin e këtij konkursi. Tani propozohet që; Në shumën prej 1000eurove, të jeni 500 për vendim e parë, 300 për vendin e dytë dhe 200 për të

tretin. Mbi këtë bazë mund të kemi numër më të madh të krijimeve artistike që vijnë në konkursin letrar për çmimin “Sulejman Krasniqi”. Plotësim-ndryshimi kërkohet vetëm te pika 3 e vendimit paraprak të vitit 2019.

Kryesuesi – Faleminderit drejtor. A ka dikush diçka rreth kësaj pike?... Nëse jo, atëherë po e vendosim në votim. Kush është për?... Me shumicë votash miratohet edhe propozim vendimi për plotësim ndryshimin e vendimit për themelimin e çmimit për krijimtari letrare artistike “Sulejman Krasniqi”.

5. Shqyrtimi dhe miratimi i propozim vendimit për lirim nga pagesa e Mamografisë për të gjitha gratë e komunës së Rahovecit;

Nënkryetari – Faleminderit i nderuar kryesues. Të nderuar kolegë, i nderuar kryetar, i nderuar deputet. Ideja është kështu; Meqenëse muaji tetor ka qenë “Muaji i ndërgjegjësimit të kancerit të gjirit” dhe ka qenë e paraparë një taksë për secilin pacientë i cili është trajtuar me mamografi. Ideja e komunës është që të lirohen nga pagesa të gjithë pacientët që trajtohen me aparatën e mamografisë. Sa e di unë, taksa ka qenë 10euro e paraparë me udhëzim administrativ prej QKMF-së. Ky veprim institucional do të ishte shumë i mirë. Ju ftoj të gjithëve ta përkrahni këtë propozim.

Besmire Bytyqi – Faleminderit kryesues, faleminderit nënkryetar. Përgëzoj ekzekutivin për këtë iniciativë për të gjitha gratë, ashtu siç e kemi diskutuar në KPF. Kjo ka qenë edhe një shtytje nga grupi joformal i grave ku bëjnë pjesë të gjitha asambleistët e kuvendit komunal dhe dy drejtoreshat, uroj që shumë gra do ta marrin trajtimin e duhur nga ky aparat.

Kryesuesi – Faleminderit shumë Besë. Respekt për ekzekutivin, por vendimi do të merret në kuvend dhe duhet t'i falënderojmë anëtarët e kuvendit pas votimit. Atëherë po e vendosim në votim. Kush është për?... Me shumicë votash aprovohet propozim-vendimi për lirim nga pagesa për Mamografi për të gjitha gratë e komunës së Rahovecit. Një shembull që duhet të duartrokitet.

6. Shqyrtimi dhe miratimi i propozim-vendimit për dhënien në shfrytëzim afatgjatë të pronës së paluajtshme të komunës nr. P-71510057 -08924-0 personave fizik dhe juridik;

Isak Hoti – I nderuar kryesues, kryetar, delegatë, drejtorë të nderuar. Gjithashtu në KPF e kemi trajtuar si çështje. Është hera e parë si vendim. Realisht në të gjitha komunat e Kosovës, në Gjilan është iniciuar si procedurë dhe sot ne po fillojmë këtë procedurë për miratim të ofertës për negociim. Baza ligjore e këtij akti është në ligjin për vetëqeverisje lokale. Te Neni 11 i ligjit për dhënien në shfrytëzim – këmbim të pronës së paluajtshme komunale si dhe në rregulloren për procedurat për dhënien në shfrytëzim – këmbim të pronës së paluajtshme komunale. Më lejoni që para jush ta prezantoj propozimin e kryetarit të komunës për dhënien e pronës në shfrytëzim për 99 vite. Qëllimi i gjithë kësaj është bazë e shprehjes së interesit nga fondacioni “Adrian ORLLATI” nga Zvicra (Llozanë). Kryetari i komunës sipas ligjit për dhënien në shfrytëzim dhe këmbim të pronës së paluajtshme komunale ka të drejtën e negociimit, këtë të drejtë ia parasheh ligji dhe rregullorja për këmbim dhe dhënie në shfrytëzim të pronës komunale, përkatësisht neni 23, ku këtë të drejtë kryetari i komunës mund ta shfrytëzojë në rastin kur vlera e investimit është së paku 10% e buxhetit të përgjithshëm për investime kapitale të komunës për vitin paraprak që d.m.th për vitin 2021. Kjo pronë gjendet te ish-Balltazari me sipërfaqe prej 3402m katror, me datë 26.09.2022 te zyra e kryetarit të komunës ka qenë presidentja e fondacionit “Adrian ORLLATI” zonja Micheline Calmy-Rey dhe përfaqësuesi Avni Orllati në prezencë edhe të zyrtarëve tjerë kanë diskutuar për këtë çështje. Ky fondacion është i interesuar që të bëjë një ndërtim të banesave, 30 deri në 35 dhoma për persona me nevojë dhe papërkujdesje. Sipas tyre qendra do të ketë mirëmbajtje, mjekë, infermierë, ushqim, barna etj... Është e domosdoshme që vlera për negociim duhet të jetë 10% e vlerës së përgjithshme të buxhetit për investime kapitale të vitit paraprak. Në vitin 2021 kemi patur gjithsej 4.286.979euro, kurse 10% e kësaj vlere është 428.697 euro dhe që sipas projektit ideor dhe parallogarisë që e kanë bërë, kjo vlerë për investim është 1.1 milion. Besoj që MAPL nuk do të na nxjerr telashe të panevojshme dhe mendojmë që kjo punë do të përfundojë ashtu siç është më së miri sepse si projekt është për çështje humanitare.

Kryetari – Faleminderit kryesues. Të nderuar anëtarë të kuvendit, drejtorë të drejtorive, nënkryetar, deputet i kuvendit të Kosovës z. Visar Korenica. Shpresova që këta të LDK-së e ftojnë edhe Avdullah Hotin. Do të përpiqemi që me deputetë nga komuna jonë dhe me grupe parlamentare dhe me komisionin funksional që t'i adresojmë dhe përfitojmë projektet që i takojnë komunës së Rahovecit. Jemi në pikën e rendit të ditës për dhënien në shfrytëzim të një parcele në të cilën parashihet të ndërtohet një vepër plotësisht humanitare dhe e pastër e bamirësisë. Fjala është për grupin “Orllati” nga Brestoci i komunës së Rahovecit, e që kanë shënuar rritje të jashtëzakonshme në Zvicër. Në nderim të kujtimit për nipit që u ka vdekur “Adrian Orllati” kanë krijuar një fondacion me po të njëjtin emër, i cili financohet prej tyre dhe udhëhiqet nga mikja e madhe e Kosovës, ish presidentja e konfederatës së Zvicrës, Micheline Calmy-Rey. Kemi patur dy takime zyrtare me drejtuesit e këtij fondacioni me “Orllati group” dhe zonjën Calmy-Rey, një takim në komunën e Rahovecit dhe poashtu kemi qenë të ftuar dhe kemi patur një vizitë me të gjitha shpenzimet e hequra në Zvicër. Fjala është për ndërtimin e një objekti banesorë për të moshuar që janë pa përkujdesje shoqërore dhe institucionale. Bëhet fjalë për banesa që i dedikohen atyre, 30-35 banesa. Ky objekt do të ndërtohet, funksionalizohet dhe mirëmbahet nga ata, pa asnjë lloj implikimi financiar nga buxheti i komunës ose i shtetit. Kanë kërkuar që t'ia japim një parcelë publike në shfrytëzim për 99 vite. Mendoj që është momenti i duhur dhe i përshtatshëm që ta vlerësojmë interesimin e tyre për t'u futur seriozisht në ndërtimin të një objekti që i dedikohet kategorisë së qytetarëve tanë që janë pa përkujdesje ose me përkujdesje të pamjaftueshme. Ju e dini që presidentja dhe kryeministri i kanë pritur këta në zyrë dhe kur i kanë pyetur se çka dëshirojnë në investojnë në Kosovë, këta iu kanë përgjigjur duke u thënë që një herë dëshirojmë investimin ta nisim në Rahovec. Në fillim projekt humanitar, ndoshta në të ardhmen do të ketë edhe ide të tjera. Parcela është objekti i vjetër i gjykatës ose ish Baltazari dhe bëhet fjalë për 34 ari. Aty janë edhe disa banorë që jetojnë, 5-6 familje që kanë marrëdhënie kontraktuale me ato banesa ekzistuese. Atyre familjeve duhet t'u jepet zgjidhje dhe këtë kërkesë që e kemi parashtruar para investitorit, ata e kanë marrë përsipër edhe këtë gjë dhe do të kujdesen që edhe atyre familjeve ndoshta edhe t'ia japin mundësinë të jetojnë në objektin e ri. Po të isha sot në vend të juajin dhe ta kisha mundësinë të votoj 31 herë, as që e kisha diskutuar këtë temë. Interesi më i madh tutje është që edhe MAPL ta konsideroj vendimin të arsyeshëm dhe mos ta vonojnë. Projekti ideor është i gatshëm dhe për 1 vit e 6 muaj ndërtimit t'i japin fund dhe brenda 2 viteve të funksionalizohet. Kostoja e ndërtimit kalon shifrën e 1 milion eurove, ndërsa sa i përket kostos së mirëmbajtjes, ata i dijnë vet ato punë, përveç që parcelën duhet ta japim në shfrytëzim. Çështja nuk është se ata nuk kanë mundësi ta blejnë një pronë private, por çështja është sesi ne i krijojmë marrëdhëniet me një investitor që ka karakter bamirësie.

Lirigzon Kastrati – Faleminderit kryesues. I nderuar kryetar, drejtorë të drejtorive, kolegë asambleistë, deputet i kuvendit z. Korenica. Diskutim nuk kemi, mirëpo e vlerësojmë investimin që do të bëhet në komunën e Rahovecit. Në emër të grupit të asambleistëve të LDK-së, e falenderojmë investitorin, konkretisht fondacionin “Adrian Orllati” me presidenten zonjën Micheline Calmy-Rey dhe përfaqësuesin z. Avni Orllati. Një projekt i vonuar por i domosdoshëm, qëllimi i së cilit dihet dhe natyrisht si grup e përkrahim propozim vendimin.

Kryesuesi – Faleminderit Lirigzon. Për shkak të çështjes së rëndësishme, i kisha ftuar prej secilit grup të asambleistave nga një anëtar të deklarohen për këtë propozim nëse e shihni të arsyeshme.

Sejfullah Sejfullahu – Përrshëndetje për deputetin. Faleminderit për prezencën. “Sa më shumë që e zgjaste kryetari, ne këtu u ndiheshim më në faj.” Është vendim shumë i mirë, përrshëndesim investimin dhe angazhimet. Për gjëra të tilla të mira e ke mbështetjen gjithmonë si opozitë. Shpresoj që edhe afaristët e tjerë të motivohen pas këtij investimi dhe në emër të PDK-së e vlerësojmë shumë.

Besë Bytyqi – Faleminderit kryesues. Faleminderit për sqarimet kryetar, në emër të grupit të AAK-së i shprehim falenderimet për fondacionin “Adrian Orllati” uroj që investimet e tilla dhe donatorët e tillë që shërbejnë për

mirëqenien e qytetarëve të Rahovecit të ndalen asnjëherë. Iu bëj thirrje njerëzve tjerë të vullnetit të mirë që të kontribuojnë në donacione të tilla.

Ilir Pallqa – Faleminderit kryesues. Ne vazhdimisht ankohemi për mungesë të pronave publike në qytet, por kur ka vullnet, pronat po dalin në pah. Uroj që e keni menduar mirë këtë projekt.

Kryesuesi – Faleminderit Ilir, edhe unë si kryesues po e shpreh falenderimin për fondacionin “Adrian Orllati” dhe për idenë e këtij projekti. Shpresoj që të shërbej për të mirën e qytetarëve tanë. Pa humbur kohë po e vendosim në votim. Kush është për?... Me shumicë unanime miratohet edhe propozim vendimin për dhënien në shfrytëzim afatgjatë të pronës së paluajtshme të komunës personave fizik apo juridik.

7. Shqyrtimi i Raportit të Auditorit të Brendshëm për vitin 2021 dhe diskutimi i planit të veprimit;

Ruzhdi Kabashi - Përshëndetje kryesues, kryetar, asambleistë dhe të gjithë të pranishëm. Para jush kemi sjellë raportin informues për punën e njësies së auditimit për periudhën 1 janar – 31 dhjetor 2021. Në këtë periudhë njësia e auditimit të brendshëm për punën e vet është bazuar kryesisht në planin vjetor të punës për vitin 2021 i cili plan ka qenë i aprovuar nga kryetari i komunës së Rahovecit. Bazë ligjore kemi pasur; Ligjin 06L-2021 për kontrollën e brendshme të financave publike, udhëzimet administrative për auditim të brendshëm, doracakun e auditimit të brendshëm, statutin e auditimit të brendshëm dhe instruksionet lidhur me standartet ndërkombëtare të auditimit të brendshëm. Sipas planit vjetor të njësies së auditimit të brendshëm për periudhën janar – dhjetor 2021 kemi arritur t'i kryejmë 10 auditime, po aq sa ishin të planifikuara. Vlerësimi i objektivave për auditimin sipas shkallës së rrezikshmërisë është bërë në planin strategjik të njësies së auditimit për vitin 2022-2024. Raporti 6 mujor i dytë i vitit 2021 është adresuar në njësinë qendrore për harmonizim të auditimit të brendshëm, kryetarit të komunës dhe komitetit për auditim të brendshëm. Gjithsej nga 10 auditime që janë kryer, janë dhënë 40 rekomandime nga të cilat 8 janë zbatuar, kurse 32 janë në proces. Si aktivitete tjera mund të cekem, ofrimi i ndihmave profesionale të vazhdueshme për të gjitha drejtoritë komunale, që kanë shfaqur interesim dhe nevojë lidhur me të kuptuarit e rreziqeve në implementimin e rekomandimeve, identifikimin, vlerësimin dhe menaxhimin e tyre. Gjithashtu njësia e auditimit të brendshëm ka pasur angazhime me të gjithë zyrtarët të cilët me një formë ose tjetër kanë qenë të kyçur në procesin e implementimit të rekomandimeve. Kjo ishte në pika të shkurtëra sa i përket raportit.

Burim Krasniqi – Faleminderit kryesues, faleminderit delegatë. Njësinë e auditimit e falënderoj për raportin e dorëzuar kësaj radhe, për punën e bërë dhe të them të drejtën për atë paraqitjen goxha të guximshme. Besoj që është faktike dhe në të mirë të komunës ajo çfarë është paraqitur në raportin e auditorit. Unë nuk jam profesionist i fushës por në bazë të asaj që e lexova është goxha parimor si raport i auditimit. Kryetari i komunës duhet ta merr në konsideratë me të vërtetë këtë çështje sepse përpos raportit të auditorit të Zyrës Kombëtare të Auditimit që del i kualifikuar me të gjetura, e kemi edhe raportin e Auditorit të Brendshëm që i ka 40 të gjetura. Është goxha shumë dhe besoj që kjo duhet të shfaqë shqetësim për krytarin e komunës. Nëpër secilën drejtori kemi të gjetura, faktikisht asnjë drejtori nuk është mbyllur pa të gjetura, është shumë shqetësuese. Duke përfshirë; Mangësi në kompensim të pagesave përcjellëse, te menaxhimi joefikas i pronës shtetërore, dobësi në menaxhim të kontratave, deri te e fundit (që mos të marrim shumë kohë për shkak të agjendës në orën 14:00, në respekt të profesorit Sabaudin Cena) te zyra e brendshme e prokurimit. Me të vërtetë të gjeturat këtu të bëjnë të mendosh që nesër përsëri mund të jetë një raport i kualifikuar i ZKA-së. Nëse themi që ka mungesë të mbulueshmërisë së fondeve në projekte, ka mungesë në zotimin e fondeve, ka vonesa në vlerësime dhe njoftime të kontratave të nënshkruara, ka mungesë të planit të menaxhimit të kontratës. Sot po them që nëse kryetari i komunës nuk e merr seriozisht dhe me përgjegjësi të plotë ta lëshoj autoritetin e vet edhe te zyra e prokurimit, jo në ndërhyrjen të dhënies së kontratave, por në bërjen mirë të punës së tyre. Unë jam i bindur që vetëm këto të gjetura përsëri e nxjerrin të kualifikuar raportin e Zyrës Kombëtare të Auditimit. Auditor, faleminderit për

njoftimin dhe punën që e keni bërë. Kryetar, besoj që e dëgjon dhe e merr me shqetësim këtë raport dhe kur të vie raporti për vitin 2022 të gjeturat (32) mos të jenë të përsëritura dhe çështje të mbyllura në vitin fiskal 2022.

Sejfullah Selfullahu – Faleminderit kryesues. Gjithashtu edhe për PDK-në raporti është shumë shqetësues. Në fakt raporti është shumë në rregull, por veprimtaria dhe këto 40 të gjetura nuk janë të rastësishme. Ajo që na intereson neve është se a ka ndonjë zotim që do të korrigojohet kjo gjendje dhe cilat janë veprimet konkrete të qeverisë komunale për këtë raport, sepse po flasim për 2021 dhe sipas të gjitha gjasave edhe 2022 do të jetë njëjtë. Duket të mendojmë se çka mund të bëjmë në 2023.

Edona Kryeziu – Përsëritje edhe një herë. Duke iu referuar raportit të auditimit, gjegjësisht çështjes 5 që flet për neglizhencën e drejtorisë së zhvillimit ekonomik, qartazi na lë të kuptojmë që kjo drejtori nuk po e kryen punën ashtu siç është zotuar. Është vlerësuar që procesi i të hyrave nuk është inkasuar në nivelin e duhur, padyshim që unë jam e interesuar të dijë se ku po qëndron problemi, a ka kapacitet drejtoria për ta bërë inkasimin e resurseve humane, nëse po, atëherë cilat janë ato pengesa?... A po këtu kemi të bëjmë me ndonjë bashkëpunim që këtë biznese kanë me suportimin e ekzekutivit.

Leonard Morina – Faleminderit kryesues. Sa i përket raportit e kam parë se të gjitha ato që i kemi theksuar nëpër seancat e kaluara, janë të gjetura edhe këtu në raport. Gjithmonë shqetësim e kemi pasur planifikimin dhe realizimin. D.m.th kanë planifikuar shumë, kanë realizuar pak, pothuajse ky problem është në të gjitha të gjeturat. Megjënëse drejtoria e arsimit është e para, po ia nisi prej saj. Shkollat e kanë një buxhet, që e planifikojnë brenda vitit sesi do të shpenzohet. Drejtori i arsimit te pagat përcjellëse ka nënshkruar urdher blerje pa i pyetur drejtorët e shkollave, d.m.th iu ka shpenzuar buxhetin e shkollave pa dijeninë e drejtorëve të shkollave. Nëse ata për muajin tetor kanë planifikuar të bëjnë diçka me ato para, kur i kanë shikuar financat e kanë marrë vesh që ato para nuk janë më dhe drejtori nuk i ka kontaktuar t'i njoftoj që ato para i kemi shpenzuar. Drejtori ka të drejtë, por duhet të merret pëlqimi i drejtorëve të shkollave. Te pika 6, nëpër shkolla ka të gjetura te përpilimi i dosjeve të mësimdhënësve. Që 5 vite drejtor i arsimit dhe të ketë ende këto probleme që janë çështje teknike d.m.th. mungojnë letërnjoftime, diplomat – dosja bazë u mungon mësimdhënësve. Te bujqësia; Këtu në raport po del që ka planifikuar për 62% më shumë për vitin 2021, faktikisht për 56% është ulur planifikimi i përealizuar. Ka shumë mospërputhje në këtë raport, në asnjë drejtori nuk ka raporte të mirëfillta që duhet të bazohen në 3 mujor, 6 mujor dhe 1 vjeçar, ka mangësi të shënimeve përkatëse.

Lirigzon Kastrati – Faleminderit kryesues. Si anëtarë të kuvendit komunal, në seancat paraprake e kemi marrur raportin e auditorit të jashtëm për të cilin kemi diskutuar. Mirëpo sa i përket kësaj pike rreth këtij raporti, nëse e analizojmë vetëm në vija të trasha, ky raport informues i auditimit të brendshëm tregon një formë të gabuar të menaxhimit nga ana e drejtorive komunale. Natyrisht, ne shprehim shqetësim lidhur me këtë raport dhe më mbetet ta pyes kryetarin se si do të reflektoj pas këtyre të gjeturave dhe çfarë veprime do të ndërmerr rreth rekomandimeve të dalura nga ky raport.

Merisa Sharku – Përsëritje për të gjithë. Në raport në auditimit, drejtoria e urbanizmit prapë del shumë keq. Citoj; Çështja 1: Mangësi në planifikim, regjistrim dhe realizim të të hyrave. Çështja 2: Zbatimi i taksës për leje të ndërtimit dhe legalizim të objekteve. Në këtë të fundit ka dalë keq sepse gati në çdo seancë e kam ngritë çështjen se duhet të ketë stimulim për të marrur leje ndërtimore, e ktu po del që kemi rënie në këtë aspekt. Gjithashtu numri i lejeve ndërtimore qëndron shumë keq.

Kryetari – Këta që janë më të vjetër dhe me më përvojë e dijnë që Raporti i Auditimit të Brendshëm nuk paraqitet në kuvend. Me kërkesën e raportit për performancë, që është një tregues dhe në këtë rast kemi dashur të japim shembull që duhet t'i shmangemi pak ligjit dhe ta paraqesim para kuvendit. E vërtetë është që aty ka të gjetura, konkluzione, rekomandime. Pra, njësia e auditimit të brendshëm i përgjigjet vetëm kryetarit të komunës dhe ekipit të kryetarit. Sidoqoftë për ta përmbushur një kërkesë të performancës, e kemi vendosur këtu. Është gjithashtu e vërtetë që ka edhe plane të veprimit për adresimin e të gjeturave, konkluzioneve dhe zbatimin e

rekomandimeve. Poashtu nuk ka drejtori që nuk ka rekomandime, rrjedhimisht të gjetura, sikurse nuk ka shansë mos të ketë angazhime për zbatimin e këtyre rekomandimeve. Sa i përket buxhetit të shkollave; Pse tani ne e përdorim autoritetin tonë, sepse ligji neve na thotë: Nuk është përgjegjëse shkolla pse nuk e ka shpenzuar, administruar dhe shpërndarë buxhetin si duhet, por është përgjegjëse komuna e Rahovecit Leonard. Drejtorja e financave dhe kryetari i komunës ka autoritet të plotë në ato situata kur nuk vepron shkolla, kur nuk i ka kryen procedurat as në investime kapitale as në mallra dhe shërbime, sepse nuk guxojmë të lejojmë që buxheti të shkon në suficit pa arsye. Sa i përket shënimeve nëpër dosje, ti ke qenë drejtor vet dhe imagjino tani që një punëtor i arsimit nuk e bie kopjen e letërnjoftimi. Kjo është kompletar sepse është kërkesë e auditorit. I ftoj mesimdhënësit, drejtorët e shkollave, punëtorët e administratës, të sektorit publik që t'i plotësojnë dosjet e veta, është detyrë e tyre. Shpresoj që rekomandimet që janë në auditimin e brendshëm dhe të jashtëm nuk janë subject i hetimit të njësisë për hetimin e krimeve ekonomike, për shkak se nuk bëhet fjalë për ndonjë keqpërdorim financiar.

Kryesuesi – Faleminderit kryetar. Para se të fillojmë me pikën 8-të, e kemi një rekomandim nga organizatat monitoruese sa i përket konsultimeve publike, e që pjesëmarrja dhe aktiviteti i anëtarëve të kuvendit nëpër konsultime publike është e zbehtë. Rekomandohet që të jemi sa më aktiv, kështu që të martën 29 nëntor, e kemi konsultimin publik për Planin e Kuvendit të Komunës (plani vjetor 2023). Poashtu edhe një vërejtje që e kemi nga MAPL si kuvend komunal për çështjen e asaj që seancat kanë mbetur pa kuorum gjatë mbledhjeve, e kemi edhe listën ku duhet të jenë nënshkrimet e mbarimit të seancës, përndryshe do të penalizoheni në mëditje mujore, nuk do të ketë tolerime.

8. Shqyrtimi i raportit vjetor të Planit të Integritetit në komunën e Rahovecit;

Kryesuesi – Raportin e kemi përpara, atëherë nëse nuk ka nevojë për prezantim, ta kemi në konsideratë pak çështjen e promovimit të atij libri, por nëse dikush dëshiron që zyrtari të dalë dhe ta prezantojë?...

Valmir Gashi – Faleminderit kryesues. Komuna e Rahovecit konform mandatit ligjor që e e ka, në bazë të planit vjetor 2022 ka paraparë që të hartohet edhe raporti për zbatimin e planit të integritetit. Raporti përfshin periudhën maj-dhjetor 2022 dhe përfshin dy fusha të rrezikut; Fushën e përgjithshme dhe fushën e veçantë. Në kuadër të këtyre dy fushave janë gjithsej 17 nënfusha me 98 masa ose propozime nga të cilat 82 ose 84.32% janë zbatuar dhe 16 masa ose 15.68% nuk janë zbatuar. Në kuadër të fushës së përgjithshme janë 4 nënfusha me 34 masa ose propozime nga të cilat 30 janë realizuar, 4 nuk janë realizuar ose janë në proces. Sa i përket fushës së veçantë janë 13 nënfusha dhe 64 masa, 52 janë realizuar dhe 12 janë në proces.

9. Shqyrtimi dhe aprovimi i vendimit për shfuqizimin e vendimit për shpalljen me interes të përgjithshëm publik P- 71510033-01041-1 në zonën kadastrale në Xërxë;

Isak Hoti – Faleminderit kryesues. Do të mundohem të jem shumë i shkurtër, mirëpo me këtë vendim të kthyer nuk e dijnë as ata vetë nuk e dijnë pse e kanë kthyer. E para e punës është, që pas 15 dite ne duhet ta kemi konfirmimin e ligjshmërisë së aktit prej MAPL-së, gjë që nuk ka ndodhur dhe e kemi pas një muaji e gjysmë. Me 23.09 është marrur vendimi në kuvend, me datë 02.11.2022 është kthyer vendimi. Jo rrallë hasim në jomirëkuptim. Vendimi është shpallur me interes të përgjithshëm public për hapjen e një rruge, ndërsa ministria në përgjigje të pika 2 e arsyetimit thotë: Pas sigurimit të provave të komunës së Rahovecit, gjegjësisht ekstraktit të planit zhvillimor komunal 01256 i datës 30.05.2013 për parcelën kadastrale 01041-1 në zonën kadastrale në Xërxë, vërtetohet se i njëjti është i destinuar për ndërtim, (është brenda kufijve ndërtimorë) mirëpo nuk është planifikuar rrugë. Në kuadër të këtij plani zhvillimor komunal, në çoftëse është ndërtim, atëherë është rruga, është kanalizimi, është ujësjellësi etj... Plus e mëtej e kësaj që nuk ka pasur rrugë, ne duhet ta shpronësojmë prej dikujt tjetër dhe ministria e ka gjetur këtë pikë që të na rikthejë në rishqyrtim këtë vendim. Ne dëshirojmë ta shfuqizojmë, mirëpo do të gjejmë rrugë tjetër që ta kompetojmë këtë pjesë të mbetur nga ministria.

Kryetari – Faleminderit Isak. Atëherë po e vendosim në votim këtë shfuqizim, kush është për?... Me shumicë votash shfuqizohet vendimi 01 nr 375/22 i datës 23 shtator.

10. Diskutimi rreth fushatës nacionale “16 ditë aktivizëm kundër dhënës në baza gjinore”.

Kryesuesi – Nëse dëshironi, vazhdojmë me disa fjalë rreth kësaj teme, ose mund t’i publikoni shkrimet në rrjetet sociale për këtë tematikë.

Besmira Bytyqi – Të flasim për këtë temë, duhet të diskutojmë mbi 2 orë; Çka mund të bëjmë ne si kuvend? Si ekzekutiv? Të propozoj ty kryesues, ta organizosh një tryezë mrenda këtyre 16 ditëve, na fton neve, shoqërinë civile, QPS-në, gjykatën, policinë etj... Aty mund ta bëjmë një diskutim kredibil. Ndërsa, grupi joformal i grave është duke përgatitur një organizim - një marshi paqësor, ju ftoj për pjesëmarrje.

Sejfullah Sejfullahu – Po ju drejtohem në emër të burrave të kuvendit. Ne, përveq që nuk jemi të dhunës aspak. Po i drejtohem gruas time me një poezi të shkurtër:

Eja sonte tek unë, shejtan.

Merri këpucët në dorë, ec pa zhurmë.

Universin ta bëjmë sa një dhomë

Kur bota e madhe të bien në gjumë

Le të fryen veriu, rrebeshi puhiza.

Në zjarrin e trupit do t’i thajmë teshat

Veç zoti për mëkatet, i fshehu ditët – na dhuroi netët

Mike më ke, para Shën Pjetrit nuk të ndaloj brenda të hysh

Pa dyshim në çast edhe ai do të ketë puthur, natyrisht.

Kryesuesi – Faleminderit Sejfullah. Kështu, me vendosjen e këtij propozimi në rend dite, besoj që simbolikisht kemi dhënë një kontribut në fillimin e kësaj fushate globale kundër dhunës me bazë gjinore. Më këtë, unë po e përmbylli seancën e 11-të të rregullt. Mirëmbetshi.

Procesmbajtësi:

Albion Krasniqi

